

DIDZA' BSÖLĚ'Ě PABLO YÖDZ ĘFESO

**Pablo rugapĚ' Dios bunách
queĚ' Cristo nacu'Ě Ęfeso**

1 Neda', Pablo, naca' gbaz nasölĚ'Ě Jesucristo le gu'ncznĚ' Dios gaca' cni. Rugapa' Dios lbi'ili', náquili' quizi queĚ' Dios len réjlĚ'li' Jesucristo, zoali' Ęfeso. ²Rnabda'-nĚ' Xuzru' Dios lenca' Xanru' Jesucristo uzá' ladxĚ'Ě queĚli' len gunĚ' ga soa dxi icj lădxi'dau'li'.

**Rata' queĚru' le nac
queĚ' Dios Bō' La'y**

³Ral-la' cu'ru'-nĚ' yöl-la' ba Dios, XuzĚ' Xanru' Jesucristo. Le nacru' tuz len Cristo, Dios chbuzá' ladxĚ'Ě queĚru' yúgu'tĚ le nac dxi'a qui yehua' yubá, le runĚ' ga rata' queĚru' Dios Bō' La'y. ⁴Zí'atĚl ca benĚ' yödzylyú ni, Dios gröczĚ' rĚ'u quiĚ gáquiru' quizi queĚ' tsazxón len Cristo, gacru' bunách la'y queĚ' len gacru' gdu dxi'a lahuĚ' LĚ'. ⁵Dios bucözĚ' zí'atĚl si' lu nĚ'Ě rĚ'u ca xzi'nczĚ' tsazxón len Jesucristo, le bdzag ladxĚ'Ě gac cni len le nac le gu'ncznĚ' gunĚ'. ⁶Ral-la' cú'teczru'-nĚ' Dios yöl-la' ba ni'a qui le buzá' ladxĚ'Ě queĚru', yugu' le bennzĚ' queĚru' le nacru' tuz len Xzi'nĚ', Nu na' nadxi'inĚ'.

⁷Cristo böa'uĚ' rĚ'u cati' ni' gutiĚ' uláz queĚru' quiĚ gac unít lahuĚ' rĚ'u Dios ca nac dul-la' nabága'ru'. ZxöntĚr nac le buzá' ladxĚ'Ě queĚru' Dios, ⁸lĚ na' runntsquĚ' queĚru' LĚ'. Lu yöl-la' rac szxöni queĚ' len lu yöl-la' rejni'li' queĚ' ⁹benĚ' Dios le bucözĚ' queĚru', bului'inĚ' rĚ'u lĚ na' bgachi', le buzoaczĚ' zí'atĚl uschinĚ' lu nĚ'Ě Cristo. ¹⁰LĚ na' buzoaczĚ' Dios uschinĚ' cati' gza'la dza, nac gunĚ' ga lac tuz, la'cuá' lu nĚ'Ě Cristo yúgu'tĚ le dĚ, le nacuá' yehua' yubá len le nacuá' yödzylyú ni.

¹¹Le nacru' tuz len Cristo, Dios gröczĚ' rĚ'u zí'atĚl quiĚ gaqui queĚru' le naqui queĚ' Xuzru' Dios, lĚ na' bucözĚ' queĚru' ca nac le gu'ncznĚ' Dios, Nu run yúgu'tĚ ca rĚ'ncznĚ' LĚ'. ¹²Cni benĚ' Dios quiĚ cu'ru'-nĚ' yöl-la' ba ca nac yöl-la' yenĚ' queĚ', rĚ'u ni ruzxöni lădxi'ru'-nĚ' Cristo zí'atĚl ca yezica' bunách. ¹³LĚzca' cni guc queĚli'. Cati' byónili' didza' gdu'tĚ li, didza' dxi'a ca gac ularu', gyĚjlĚ'li' Cristo, ati' Dios buzóĚ' queĚli' le nac bĚ' nacli' queĚ', buchiziĚ' icj lădxi'dau'li' Dios Bō' La'y, Nu na' gzxi' lu nĚ'Ě Dios gsölĚ'Ě queĚru'. ¹⁴Le zóalenĚ' rĚ'u Dios Bō' La'y, nac

löz gaqui queëru' le naqui queë'
Xuzru' Dios cati' udx huöa'uë' rë'u,
rë'u na' chnáquiru' queë'. Cni nac
quië gac yöl-la' ba qui yöl-la' yení'
queë'.

**Pablo rnabnë' Dios unödzejë' quegac
bunách ta'yejlë' Cristo yöl-la' rejni'i**

¹⁵Qui læ ni na', cati' byönda' ca
réjlë'li'-në' Xanru' Jesús, len ca
nadxi'ili' yúgu'të bunách queë'
Dios, ga rdxintë na'a dza ¹⁶cutu ca'
rusana' rëpa'-në' Dios: Xclenu', ca
nac queëli'. Rajneyda' lbi'ili' cati'
rulidza'-në' Dios. ¹⁷Rnabda'-në'
Dios queë' Xanru' Jesucristo, naquë'
Xuzru' náctërë' blau, rnabda'-në'
gsölë'ë queëli' Dios Bö' La'y, Nu
runn queëru' yöl-la' rejni'i len
rulu'f'i rë'u ca nacczë' Dios, quië gac
gdu ca núnbë'ru'-në'. ¹⁸Rnabda'-në'
Dios uzéjni'në' lbi'ili' lu içj
ládxi'dau'li' quië gac gnózilí' ca
nac le runru' löz, læ na' bulidzë'
lbi'ili' quië uzi'li' xbey, len quië
gnózilí' ca nac yöl-la' tsahui' qui
yehua' yubá le gaqui quegac nup
náquigac queë' Dios, ¹⁹lenca' quië
gnózilí' cati' zxön nac yöl-la' huac
queë', le raclen rë'u ni réjlë'ru' Lë'.
Yöl-la' huac zxön ni nac la' leyz na'
bulu'ë lahui Dios ²⁰cati' ni' buspanë'
Cristo lu yöl-la' gut len benë' ga
grö'ë cuít læ'ë Dios ga náctërë' blau
ni' yehua' yubá. ²¹Ni' rna bé'inë'
nup ni' ta'ná bë' len nup ni' dë
lu na'gac, len nup ni' nadél-li'gac
yöl-la' huac, len nup ni' nacgac xan.
Cristo náctërë' blau ca yúgu'të nup
nadél-li'gac yöl-la' uná bë' yödzlyú
ni len lu yödzlyú zi'a za'. ²²Dios
budödë' lu në'ë Cristo yúgu'të le dë
quië gna bé'inë' lei, len buzóë' Lë'

quegac bunách queë' quië gaquë'
Xanru' lu yúgu'të le naqui queëru'.
²³Nacgac ca gdu ca nayá' nabanë'
Cristo bunách queë', ati' raquë' gdu
lu le nayá' nabanë' na'. Runczë' Lë'
ga rac gdu yúgu'të le dë.

Nularu' le nadxi'inë' rë'u Dios

2 Dios chbennë' queëli' yöl-la'
na'bán gdu, zal-la' zí'atël guclí'
ca bönni' natgac ni'a qui dul-la'
nabága'li' len ni'a qui dö' bia'li'.
²Dza ni' benli' tuz ca tun bunách
cunacgac tsahui' nacuá' yödzlyú
ni, len benli' ca gu'ni tu' xöhui', nu
rna bë' lu bö'z len rugún dxin nup
cutún ca rna xtídzë'ë Dios. ³Lëzca'
cni gucu' yúgu'tëru' rë'u, le benru'
ca gzëz ládxi'ru' len ca bdzag
ládxi'ru' lu yöl-la' bunáchz queëru'.
Qui læ ni na' gbága'ru' dul-la' lahuë'
Dios le ben ga gunë' rë'u zxguia' ca
gunë' quegac yezica' bunách. ⁴⁻⁵Ni'
cati' ni' nacru' ca bönni' natgac
ni'a qui dul-la' gbága'ru', Dios
buspanë' rë'u lu yöl-la' gut tsaxón
len Cristo le buechi' ladxë'ë rë'u
len bdxí'itsquinë' rë'u. Nulali' le
zoa le buzá' ladxë'ë queëli' Dios.
⁶Dios buspanë' rë'u tsaxón len
Cristo quië gunë' ga cö'ru' tsaxón
len Lë' ga ni' rna bë'ë yehua' yubá.
⁷Cni benë' Dios, bului'inë' bunách
zi'a za'c ca nac yöl-la' tsahui' qui
le buzá' ladxë'ë queëru', bsölë'ë
queëru' Jesucristo, le nac bë' ca
nadxi'itsquinë' rë'u. ⁸Nulali' le
zoa le buzá' ladxë'ë queëli' Dios le
réjlë'li' Cristo. Buslé' lbi'ili', clëg le
nacuá' le nac dxi'a benli' lbi'ili', san
le nac le runzë' Dios. ⁹Nutu nu gac
gun ba zxön cuini le nulá, le cutu
nulá le nacuá' le nac dxi'a nun nu

na'. ¹⁰Le nacru' nac le nunczè' Dios. Le nacru' tuz len Jesucristo, buzóè' rè'u quiè gunru' le nacgac dxi'a, le bucözè' zí'atèl gunru'.

Rò' dxi icj ládxi'dau'ru' lahuè'
Dios ni'a qui le benè' Cristo

¹¹Gul-tsajnéy ca gucli' zí'atèl. Gucli' bunách gza'a, len qui lè ni na' yugu' bönni' judío, bönni' na' ta'chuguè' lu xpéla'què' le nac bè' náquicnè' queè' Dios, len nazí' laquè' bönni' narugu lu xpéla'què', ta'né' queèli' nacli' bönni' cunarugu lu xpéla'què'.
¹²Dza ni' nubíga'li' ga zoè' Cristo. Gucli' bönni' gza'a laugac bunách Israel, len cutu buzi'li' xbey didza' benè' tsutsu Dios le gzxi' lu në'è gata' quegac bunách queè'. Gzoali' yödzyú ni, cuzóa le runli' löz, len cunúnbè'nili'-nè' Dios. ¹³Na'a, nacli' tuz len Jesucristo. Zí'atèl nubíga'li' lbi'ili' zi'tu' ga zoè' Dios, san na'a nudxiguè'è lbi'ili' gal-la'z Dios le gutiè' Cristo uláz queèru'.
¹⁴Lèczè' Cristo runè' ga rò' dxi icj ládxi'dau'ru' lahuè' Dios. Lè' benè' ga guluhuöaquè' tuz bunách yugu' bönni' judío len yugu' bönni' gza'a, busulè' yöl-la' rley le bubíj lequè' chopl ca tu zö'ö. ¹⁵Lè ni benè' Cristo cati' gutiè' uláz queèru', busulè' yugu' zxba len yugu' le rna bè' nayujgac lu zxba quegac bunách judío, ati' chop cö' bunách na', bunè' tuz bunách cub, nup nacgac tuz len Lèczè'. Cni benè', glequi dxiè' yöl-la' rley na'. ¹⁶Le gutiè' Cristo lè'i yag cruz, busulè' yöl-la' rley na', ati' chop cö' bunách na', bunè' lequè' ca tuz bunách len glequi dxiè' icj ládxi'dau'què' lahuè' Dios.

¹⁷Cni guc, bulu' lahuè' Cristo len benè' lban qui didza' dxi'a ca rbequi dxiè' yúgu'tè bunách, lbi'ili' na' nacli' bunách gza'a len zoali' zi'tu' ga zoè' Dios, lenca' bunách judío nacuá' gal-la'z. ¹⁸Na'a, ni'a qui le benè' Cristo, gac gbíga'ru' lahuè' Xuzru' Dios, le zóalenè' rè'u la' Lèzczè' Dios Bö' La'y, zal-la' nacru' bunách judío o bunách gza'a. ¹⁹Qui lè ni na', lbi'ili', bunách gza'a, cutur nacli' ca bunách zi'tu' zoali' tu luyú cunaqui queèli', san nabáblenli' bunách queè' Dios. Chnacli' di'a dza queè' Dios. ²⁰Lbi'ili' nacli' ca tu yu'u zoa tsaz. Nacli' ca guiøj xzoagac lahui xlibi zö'ö, le gulucu'è bönni' gbaz queè' Cristo len bönni' glu'è didza' uláz queè' Dios, ati' Lèczè' Jesucristo naquè' ca guiøj blau qui xlibi zö'ö na'. ²¹Gdutè yu'u na' le nacli' lbi'iczi' ryas lahui xlibi zö'ö na' nacczè' Cristo, nacuá' tu'láp guiøj qui, quiè gac tu gdau' la'y le nac tuz len Xanru'. ²²Lbi'iczi' nacli' tuz len Cristo Nu buzóa lbi'ili' quiè gacli' ca tu yu'u ga na' yu'è Dios, le zóalenè' lbi'ili' Dios Bö' La'y.

Naquè' Pablo huen lban qui didza'
dxi'a laugac bunách gza'a

3 Qui lè ni na', neda', Pablo, yu'a lidx guia le runa' lban queè' Jesucristo quiè uzi'li' xbè', lbi'ili', bunách gza'a. ²Ráquida' chnózcizli' ca benè' Dios, budödè' lu na'a dxin runa' quiè uzi'li' xbey le ruzá' ladxè'è queèru'. ³Dios bulu'è lahui le bgachi' queè', len buzèjni'nè' neda' ca nac. Ca nac lè ni chbuzuja' queèli' lu guich láti'dau'. ⁴Cati' ulabli' lè ni, gúnbè'li' le réjni'da' ca nac le bgachi'

ca nac queë' Cristo. ⁵Dza ni'tè nutu nu buzéjni'nè' Dios ca nac le bgachi' na', san na'a, lu në'è Dios Bò' La'y, chbulu'è lahui Dios ca nac, bului'inè' yugu' bònni' gbaz la'y queë' len bònni' tu'è didza' uláz queë'. ⁶Cni rna lè na' bgachi': "Ni'a qui didza' dxi'a la'del-li' bunách gza'a tsazxón len bunách judío le naqui queë' Dios, luhuöaquè' ca tuz bunách, len luzi'è xbey tsazxón len lequè' le gzxì' lu në'è Dios unödzejè' quequè' le dzagquè' Jesucristo." ⁷Dios buzá' ladxè'è quia' le bennè' quia'. Lu yöl-la' huac zxön queë' benè' neda' huen lban qui didza' dxi'a queë'. ⁸Nacra' cuidi'z ca yúgu'tè bunách queë' Dios, san Lè' buzá' ladxè'è quia' gaca' huen lban laugac bunách gza'a qui didza' dxi'a ca nac yöl-la' tsahui' queë' Cristo, le záqui'tsqui. ⁹Dios budödè' lu na'a guna' ga láquibe'i yúgu'tè bunách ca nac le buzoaczè' Dios dza ni'tè, lè na' nac tu le bgachi' queë' Dios, Nu ben yúgu'tè le rlé'iru'. ¹⁰Cni guc, quiè láquibe'i na'a gdu ca nac yöl-la' rejni'i queë' Dios yúgu'tè nup ta'ná bè' len nup dè lu na'gac ni' yehua' yubá, cati' la'le'i ca nacgac bunách queë' Cristo. ¹¹Dios benè' lè ni, buschinè' lè na' buzoaczè' dza ni'tè, le benè' lu në'è Xanru' Jesucristo. ¹²Le nacru' tuz len Cristo, nazi'ru' latj gbíga'ru' lahuè' Dios, nacru' rugu ladxì' le réjlè'ru' Lè'. ¹³Qui lè ni na' ráta'yua' lauli' cugác chop ládxi'li' ni'a qui le rzaca' rguia' neda' quiè gáclena' lbi'ili', le nac tu le uzi'li' xbey.

Ca nac yöl-la' nadxí'i queë' Cristo

¹⁴Qui lè ni na' ruzechu zxiba' lahuè' Xuzè' Xanru' Jesucristo.

¹⁵Ca lè' nazí' ca' lagac yúgu'tè bunách queë', nup nacua' yehua' yubá len nup nacua' yödzyú ni. ¹⁶Rnabda'-nè' Xuzru' Dios, lu yöl-la' yení' záqui'tsqui queë' gunnè' queë'li' yöl-la' huac queë' Dios Bò' La'y len gunè' ga gal-li' lu icj ládxi'dau'li'. ¹⁷Rnabda'-nè' Cristo soè' icj ládxi'dau'li' le réjlè'li' Lè'. Rnabda'-nè' gunè' ga soali' tsaz lu yöl-la' nadxí'i queë', cutséaj bö' icj ládxi'dau'li' ca nadxí'ili'-nè', ¹⁸quiè gac tséjni'li' tsazxón len yúgu'tè bunách queë' Cristo ca nac yöl-la' nadxí'i queë', tsca ga rdxin ni'l len na'l, len dxi'l len xtsa'l. ¹⁹Rnabda'-nè' Dios gunè' ga gúnbè'li' yöl-la' nadxí'i na', le cugác gúnbè'ru' gdu ca nac, quiè gdu soalen lbi'ili' gdu le nacczè' Dios. ²⁰Na'a, yöl-la' ba Dios, Nu gac guntèr ca gac gnabru' o ca gac sa' ládxi'ru', ugunè' dxin yöl-la' huac queë' lu icj ládxi'dau'ru'. ²¹Gactecz queë' Dios yöl-la' ba laugac bunách queë' Cristo len lahuè' Léczè' Jesucristo, na'a dza len yúgu'tè dza zi'a za'c. Ca' gac.

Nunè' rë'u tuz Dios Bò' La'y

4 Na'a, ráta'yua' lauli' neda', yu'a lidx guia ni le runa' lban queë' Cristo, rnabda' lbi'ili' gunli' gdu ca ral-la' lun nup bulidzè' Dios quiè láquigac queë', ca na' bulidzè' ca' lbi'ili'. ²Gul-gác nöxj ladxì' len dxi'i ladxì'. Gul-cóz zxön ladxì' len gul-güi' ládxi'li' lza'li' tuli' yetuli' lu yöl-la' nadxí'i queë'li'. ³Gul-güi' ládxi'li' gácteczli' tuz ca na' chnunè' lbi'ili' Dios Bò' La'y, gunli' cni lu yöl-la' rböz dxí'adau' queë'li' le rutság lbi'ili'.

4 Tuz nac gdu ca nayá' nabané'
 Cristo le dzagru' rè'u.
 Tuzè' naquè' Dios Bò' La'y
 zóalenè' rè'u.
 Tuz nac le runru' lòz, lè na'
 bulidzè' rè'u Dios quiè uzi'ru'
 xbey.
 5 Tuzè' naquè' Xanru'.
 Tuz le réjlè'ru'.
 Tuz le bdilru' nis.
 6 Tuzè' naquè' Dios Nu nac Xuzru'
 yúgu'tèru'.
 Lè' rna bé'inè' yúgu'tèru' len
 rugunè' dxin yúgu'tèru' len rbözczè'
 Lè' lu icj ládxi'dau'ru' yúgu'tèru'.
 7 Tu turu' nazi'ru' tu yöl-la' huac
 queè' Dios tsca nac le bennè'
 queèru' Cristo. 8 Nac cni ca na'
 nayúj lu guich la'y, rna:
 Buèpè' yehua' yubá, rchè'è zian
 bunách guladzungac.
 Gdisiè' quegac bunách le runnzè'
 quequè'.
 9 ¿Bizxa rè'ni gna lè na' rna:
 “Buèpè!”? Rusèdi rè'u bötjè' zi'al,
 bdxinè' dxi'l yödzyu ni. 10 Nu
 na' bötj nac la' leyz Nu na' buèp
 xtsa'tèr ni' yehua' yubá quiè gdu
 budzè'è yúgu'tè len le nacczè' Lè'.
 11 Cristocz bennè' qui queèru' yugu'
 yöl-la' huac queè':
 Bè' latj la'què' bönni' lacquè'
 gbaz queè'.
 Benè' ga tu'è didza' uláz queè'
 Dios yela'què' bönni'.
 Bsölè'è yela'què' bönni' tsjenquè'
 lban qui didza' dxi'a.
 Bucu'è yela'què' bönni' quiè lun
 chi'è bunách queè'.
 Bucu'è yela'què' quiè lusèdnè'
 bunách queè'.
 12 Cristocz bupè'è cni bunách queè'
 quiè gac lun xchinè', quiè lun ga

lac gdu nup nacgac ca gdu ca nayá'
 nabanè' Lè'. 13 Cni gac ga gdxintè
 dza huöacru' tuz yúgu'tèru' ca
 réjlè'ru' Cristo len ca núbè'ru'-nè'
 Zxi'nè' Dios. Gacru' nal len huöacru'
 gdu ca naquè' Léczè' Cristo. 14 Cutur
 gacru' ca bi'idau', ca nacgac nup
 na' tu'tsa'tè ca tun, len nacgac ca
 tu le naché' lu yegu, o ca tu le rchè'
 bíti'tèz bö' reycj, ta'zi' lu na'gac
 bíti'tèz didza' nu rusèdi lequè', nu
 na' rzi' ye'i lequè' len yöl-la' sina'
 qui len run ga ta'chixi ta'nignè'.
 15 Na'a, rè'u ni, le nadxi'iru' lza'ru',
 ral-la' güi'ru' didza' le nac gdutè
 li quiè gac huöacru' gdu ca naquè'
 Cristo, len gacru' tuz len Lè', Nu nac
 Xani gdu ca nayá' nabanè' le nacru'
 rè'u. 16 Cristocz runè' ga rdzag
 dxi'a gdu ca nayá' nabanè' le nacru'
 rè'u, ati' gdutè ca nayá' nabanè' na'
 naguel-la' tsaxón ni'a qui lè na'
 run tuz gdu ca nayá' nabanè'. Cati'
 runru' xchinru' tu turu' rè'u na'
 dzagru' gdu ca nayá' nabanè', gdutè
 rxzön len rac gdu, ca na' zeaj racr
 gdu ca nadxi'iru' lza'ru'.

**Yöl-la' na'bán cub napru' le
nacru' tuz len Cristo**

17 Uláz queè' Xanru' rèpa' lbi'ili' lè
 ni len rgu'a lei lu na'li', rnia': Cutur
 gunli' ca tun nup cunúbè'gac
 Dios, nup na' ca ta'zá'z ládxi'gac
 tun 18 len nachúl nanitgac icj
 ládxi'dau'gac. Le nacquè' cunözi
 len nazidquè', cutu nazi'què' yöl-la'
 na'bán na' runnè' queèru' Dios.
 19 Cutu ca' tu'tui'nè'. Nudód cuinquè'
 lu le cunác. Gdu ládxi'què' tunè'
 yúgu'tè le cunác. 20 Nup ni' gulusèdi
 lbi'ili' ca nac queè' Cristo, cutu ca'
 gulusèdi lbi'ili' gunli' ca tun bunách

cni. ²¹Le nac gdtè li byónili' ca nac queè' Cristo, len le nacli' queè' tu'sèdi lbi'ili' le nac gdtè li na' zoalen Jesús. ²²Gul-ná be'i yöl-la' bunáchz queèli' le gucli' zi'al, lè na' rnit ni'a qui yöl-la' rzè ladxì' queèli' le cunác le gzxi' ye'i lbi'ili'. ²³Ral-la' huóaclì' cub lu icj ládxi'dau'li' len lu bõ' nacczli'. ²⁴Ral-la' si'li' yöl-la' bunách cub le nunè' Dios ca nacczè' Lè' le ruluí' cuini le run ga runli' le nac dxi'a len le nac tsahui'.

²⁵Qui lè ni na', cutur si' yè'li'. Yúgu'tèru' ral-la' güi'lenru' lza'ru' didza' le nac, le dzagru' yúgu'tèru' gdu ca nayá' nabanè' Cristo.

²⁶Chqui' hualeyli', cutu ral-la' gunli' dul-la'. Cutu leyli' xtsey. ²⁷Cutu bi gunli' le güi' latj tu' xõhui' uxícj lbi'ili'.

²⁸Nu bönni' rbanè' ral-la' usanè' yöl-la' gban queè' len tsaziè' huen dxin quiè gata' queè' bi unödzejè' quegac nup ta'yadzji.

²⁹Cutu güi'li' didza' xõhui', san güi'li' didza' dxi'a, yugu' le laclen nu yõni len lun ga gac dxi'a qui nu na'. ³⁰Cutu ushuí'nili' Dios Bõ' La'y, le nac bè' náquili' queè' Dios le zóalenè' lbi'ili' Dios Bõ' La'y, ati' gdxin dza udx uslé' lbi'ili' lu dul-la'.

³¹Gul-cúa ladj lbi'ili' yöl-la' ruzxè'i len yöl-la' rdza'a len yöl-la' rley, len yöl-la' rdil-l didza' len yöl-la' rutság yudxi, len yúgu'tè yöl-la' curle'i lza'li' dxi'a. ³²Ral-la' gacli' dxi'i ladxì' len huechi' ládxi'li' lza'li' tuli' yetuli' len unít lauli' lza'li' tuli' yetuli', ca na' benè' Dios, bunít lahuè' lbi'ili' le nacli' tuz len Cristo.

Ca ral-la' lac nup nacgac zxi'nè' Dios

5 Le nacli' zxi'nczè' Dios ati' nadxi'inè' lbi'ili', gul-güi'

ládxi'li' gacli' ca naquè' Lè'. ²Ca nac yúgu'tè le runli', ral-la' gdxì'ili' lza'li', ca na' benè' Cristo, bdxì'inè' rè'u len budód cuinè' lu yöl-la' gut uláz queèru', ben cuinè' ca böa' bédxdau' rudódiru'-ba' lahuè' Dios ni'a qui dul-la' nabága'ru'. Guquè' ca' ca tu le rla' zxi' rdzag ladxè'è Dios le rgu'ru' lu bcugu la'y queè'.

³Le nacli' queè' Dios, cutu ca' gunli' le cunác, len cutu gunli' le cural-la' gunli', len cutu uhuídi'li'. Ni'r nutu nu gac bi gnè queèli'.

⁴Cutu güi'li' didza' xõhui' o didza' cunác o didza' ca'z, yugu' le cural-la' gunli', san nacr dxi'a guièli'-nè' Dios: "Xclenu'." ⁵Chnöziczli' cutu ca' tsaziè' ga rna bè'è Cristo tsaxxón len Dios nitúè' bönni' runè' le cunác, o nu bönni' runè' le cural-la' gunè', o bönni' ruhuídi'nè'. Nu na' ruhuidi' nac ca nu rij ladxì' bdau' guiöj bdau' yag. ⁶Cutu güi'li' latj nu si' ye'i lbi'ili' len didza' cunác. Ni'a qui dul-la' cni Dios gunè' zxguia' nup cutún ca rna xtídzè'è. ⁷Cutu ca' gunli' tuz bunách cni.

⁸Zí'atèl gzoali' ga chul xõhui', san na'a zoali' lu yení', le nacli' tuz len Xanru'. Gul-gác ca bunách qui yení', ⁹le run yení' na' ga gacru' dxi'i ladxì' len ga güi'ru' didza' le nac gdtè li, len ga gacru' tsahui'. ¹⁰Gul-güi' ládxi'li' gnózili' le rdzag ladxè'è Xanru'. ¹¹Cutu gútsa'li' nup tun le cunác, lè na' tunè' ga chul xõhui', san gul-bíj ga lna' yugu' lè na' tunè'. ¹²Utui'ru' güi'ru' didza' ca nac le tun bagachi'z bunách. ¹³Cati' bi ubijru' ga lna', gac bè' yúgu'tè tscá nacgac, le gun le nac yení' ga gac bè' yúgu'tè. ¹⁴Qui lè ni na' nayúj lu guich lè na' rna:

Bubán, li' na' rasiu'.

Gyas ladj nup natgac.

Cristo uzéni'è quiu'.

¹⁵Gul-yú cuinli' ca runli'. Cutu gacli' curejni'i, san gul-gác bunách ta'yejni'i. ¹⁶Gul-sí' xbey latj dè queëli' le choaru' dza curác dxi'a queëru'. ¹⁷Cutu gacli' cunözi. Gul-güi' ládxi'li' tséjni'li' le r'ennë' Xanru' gunli'. ¹⁸Cutu súdxili', le gun yöl-la' rzudxi ga nitli' tsaz. Gul-güi'tsca latj gna bé'inë' lbi'ili' Dios Bö' La'y. ¹⁹Gul-güi'len lza'li' didza' tuli' yetuli' ugunli' dxin yugu' le rul-l lëgac salmo, len yugu' le rul-l yöl-la' ba Dios, len yugu' le rul-l nagu'è icj ládxi'dau'ru' Dios Bö' La'y. Gdu ládxi'ru' ral-la' gul-lru' queë', cu'ru'-në' Dios yöl-la' ba. ²⁰Gul-gún dxin lë' Xanru' Jesucristo, len gul-guítéczë' Xuzru' Dios: Xclenu', ca nac yúgu'të.

**Ca ral-la' gunru' quegac
di'a dza queëru'**

²¹Gul-gún ca rna xtidza' lza'li' tuli' yetuli' quië cni gunli'-në' Dios zxön.

²²Lbi'ili', ngul, gul-gún ca rna xtídza'quë' bönni' qui queëli', ca na' ral-la' gunli' ca rna xtidzë'è Xanru'.

²³Cni ral-la' gunli', le rna bé'inë' ngul bönni' ca na' runë' Cristo, rna bé'inë' bunách queë'. Cristo naquë' ca' Nu ruslá bunách queë', nup na' dzaggac gdu ca nayá' nabanë' Lë'. ²⁴Ca na' tun ca rna xtidzë'è Cristo bunách queë', lëzca' cni ral-la' lunnu ngul ca rna xtídza'quë' bönni' qui queëcnu ca nac yúgu'të le rac.

²⁵Lbi'ili', bönni', ral-la' gdx'i'ili'-nu ngul qui queëli' ca na' Cristo nadxi'inë' bunách queë' len budód

cuinë', gutië' uláz quequë'. ²⁶Cni gutië' Cristo quië bubijë' quizi queë' Dios bunách queë' na', ati' nayargac tu lu nis le nac xtidzë'è. ²⁷Gutië' uláz quequë' quië gac uschinë' lequë' lahuë' Dios, nacque' ca tu lari' lach, cutu nua' bösj le ni'aj, len cutu naxú'n, len cutu zoa nitú le run ditj lei, san runë' ga lacquë' gdu dxi'a, nutu nu gac bi gnë quequë'. ²⁸Ral-la' gdx'i'ili'-nu ngul qui queëli' ca na' nadxi'í cuinli'. Nu bönni' nadxi'inë'-nu ngul queë', nadxi'í cuinë'. ²⁹Nutu nu bönni' runi zi' cuinë', san rugagu len run chi'li cuinë', ca runë' ca' Cristo le rúnlenë' bunách queë', ³⁰nup dzaggac gdu ca nayá' nabanë', ati' rë'u ni dzagru' gdu ca nayá' nabanë' Lë'. Náquiniru' xpëlë'è len dxit queë'. ³¹Lëzca' cni nayúj lu guich la'y, rna: "Qui lë ni na' bönni' ral-la' uca'në' xuz xnë'è quië tsajsóalenë'-nu ngul queë', ati' gproptë' luhuöaquë' tuz." ³²Lë na' nayúj lu guich ni rulu' lahui tu le nac gdutë li, ati' neda' ráquida' rui' didza' ca' ca nac queë' Cristo len bunách queë' na'. ³³Lëzca' rui' didza' ca nac queëli'. Yúgu'tëli' lbi'ili', bönni', ral-la' gdx'i'ili'-nu ngul qui queëli' ca na' nadxi'í cuinli', ati' ral-la' lunnu ba la'n bönni' qui queëcnu ngul.

6 Lbi'ili', bi'idau', ral-la' gunli' ca rna xtídza'quë' xuz xna'li' quië cni gunli' ca rna xtidzë'è Xanru'. Le nac tsahui' ral-la' gunli'. ²Zxba na' benë' zi'al Dios le naché' tu le gzxi' lu në'è Dios gunë', nac lë na' rna: "Ben ba la'n xuz xna'u, ³ati' gac dxi'a quiu' len xtsey su' gbanu' yödzylyú ni."

⁴Lbi'ili', xuz, cutu gun leyli' zxi'nli', san gul-scúl-cbi', gut

quincli'-bi' len usédicli'-bi' ca rdzag ladxé'ë Xanru'.

⁵Lbi'ili', nul-li' nacli' bönni' nadá'ugac, gul-gún ca rna xtídza'què' xanli' luyú ni gdu ládxi'li', gunli' lequè' ba la'n lu yöl-la' radxi queëli', gunli' xchinquè' ca ral-la' gunli' xchinè' Cristo. ⁶Gul-gún xchinquè', clègz cati' ni' tu'yúè' lbi'ili' quiè urujli' dxi'a lauquè', san gdu ládxi'li' gul-gún xchinquè' ca rdzag ladxé'ë Dios, ca na' ral-la' gunli' xchinè' Cristo. ⁷Gdu ládxi'li' gul-gún xchinquè', ati' cni gac, gunli' xchinè' Xanru' len clègz xchingac bunách. ⁸Nózcizli' ca gunè' Xanru'. Gunnè' qui queëru' tsa nac le dxi'a runru' zal-la' nadzanru' o zal-la' nacru' bönni' nadá'ugac.

⁹Lbi'ili', nacuá' queëli' bönni' nadá'ugac, gul-gún dxi'a cni quegac huen dxin queëli' na', cutu uzeyli' ba nadx lequè'. Gul-tsajnéy ca nac queëli', yu'uli' lu në'ë Xanru' zoè' yehua' yubá la' tuz ca nac quequè', ati' Lè' cutu rutsé'ë ca runè' qui queè bunách.

Runnè' queëru' Dios le tun chi'i rë'u

¹⁰Na'a, böchi' lza'adau', gul-gác tsutsu le nacli' tuz len Xanru', zoalen lbi'ili' yöl-la' huac zxön queè'. ¹¹Gul-gún chi'i cuinli', ugunli' dxin yugu' le runnè' queëru' Dios, le tun chi'i rë'u, quiè gac soali' tsutsu cati' guè'ni si' bè' lbi'ili' tu' xöhui'. ¹²Cutu rdíl-lenru' bunách náquicni bëla' len dxit, san rdíl-lenru' yöl-la' uná bè' quegac bö' xöhui' ta'dá lu bö'z, dzaggac nup ta'ná bè', len nup nadél-li'gac yöl-la' uná bè', len nup dë lu na'gac, nacuá' yödzlyú ni ga nac chul xöhui'. ¹³Qui lë ni na',

Gul-sí' yúgu'tè le runnè' queëru' Dios, le tun chi'i rë'u, quiè cati' gdxin queëru' dza ni' lac le nacgac xöhui', gac gual glenli', len cati' udx gunli' cni, uga'nli' tsutsu.

¹⁴Gul-zóa tsutsu.

Gul-sí' le nac gdutè li, le gac queëli' ca tu guid guga' lë'li'. Gul-gác tsahui', le gun chi'i lbi'ili' le nac tsahui' ca run tu lari' yödx run chi'i lchu'ë bönni' rijè' gdil-l.

¹⁵Gul-zóa sina' quiè gunli' lban qui didza' dxi'a le rbequi dxi icj ládxi'dau'ru' lahuè' Dios, ca na' ruzóa cuinë' sina' rdë'ë lölè' bönni' rijè' gdil-l.

¹⁶Le nac blau, yöl-la' rejlé' queëli' Cristo gac queëli' ca tu le nac tsutsu uzèli' lauli', cui gál-la'-li' yugu' le usán tu' xöhui', le nacgac ca yag uxiti' zoa gui' láhuigac.

¹⁷Yöl-la' ruslá gac queëli' ca tu lu'u guia le gun chi'i icjli'. Xtidzè'ë Dios gac queëli' ca tu guia tuchi' le runnè' queëru' Dios Bö' La'y, utíl-lenru' le nac xöhui'.

¹⁸Gul-gún yúgu'tè lë ni len gul-lidzè' Dios, gnábili'-nè' gáclenè' lbi'ili'.

Gul-lídzteczè' Dios, zóalenè' lbi'ili' Dios Bö' La'y.

Quiè gunli' cni, ral-la' uspán ládxi'li' len cuhuóa ládxi'li', gnábili'-nè' Dios gáclenè' nup náquigac queè'.

¹⁹Gul-lidzè' Dios, gnábili'-nè' gáclenè' ca' neda', gunnè' quia' didza' cati' ral-la' gu'a didza', len gunè' ga gaca' rugu ládxi' cati' guna' lban quiè uzèjni'da' bunách

ca nac le bgachi' qui didza' dxi'a.
²⁰Dios budödë' lu na'a didza' dxi'a
 na' quië guna' lban qui, ati' le bena'
 cni yu'a lidx guia ni. Gul-lidzë' Dios
 chqui'nu', gnábili'-në' gunë' ga gaca'
 rugu ladxi' quië guna' lban qui
 didza' dxi'a, ca ral-la' guna'.

Ruúdx didza' bë'ë Pablo

²¹Tíquico, bóchi'ru' na'
 nadxí'iru'-në', len runë' xchinë'
 Xanru' gdu ladxë'ë, quíxjöi'në' lbi'ili'
 gdu ca rac quia' len ca runa' neda'

ni. ²²Qui lë ni na', gsöla'a-në' queëli'
 ati' ului'inë' lbi'ili' ca rac queëtu',
 ati' cni utipë' ládxi'li'.

²³Rnabda'-në' Xuzru' Dios lenca'
 Xanru' Jesucristo gunë' ga soa dxi
 icj ládxi'dau'li', len gata' queëli'
 yöl-la' nadxí'i le dzag yöl-la' rejlë'
 queëli' Cristo, yúgu'tëli' na' nacli'
 queë'. ²⁴Le ruzá' ladxë'ë queëru'
 Dios gac queëli', yúgu'tëli' na'
 nadxi'ili'-në' Xanru' Jesucristo, nac
 gdu yöl-la' nadxí'i queëli' Lë'. Ca'
 gac.